



Sidrach, Misach, & Abdenago, refusans d'adorer l'Idole que le Roy auoit fait faire, sont mis en vne fournaïse ardente, où ils ne sentent aucun mal.

LE Roy Nabuchodonosor fit vne statuë d'or de soixante coudées de haut, & de six coudées de large, & l'a dresta au Champ de Dura, en la Prouince de Babylone, pour estre adorée par vn chacun; & ordonna, que si quelqu'un ne l'adoroit point en se prosternant, à la mesme heure il seroit mis en la fournaïse de feu ardent. Il fut rapporté au Roy, que trois ieunes hommes Iuifs nommez Sidrach, Misach & Abdenago, ne vouloient adorer la susdite statuë. Adonc Nabuchodonosor remply de fureur commanda aux plus forts de son armée, que lians les pieds de ces trois hommes, ils les iettassent en la fournaïse ardente: Ce qui fut promptement executé. Or la flamme du feu occit les hommes qui y auoient ietté Sidrach, Misach & Abdenago, & ces trois hommes-cy cheurent liez ensemble au milieu de la fournaïse, & cheminoient au milieu de la flamme, en loüant Dieu, & benissant le Seigneur: l'Ange duquel descendit en la fournaïse, & fit sortir la flamme du feu hors d'icelle, & fit le milieu de la fournaïse comme vn vent de rosée soufflant, & le feu ne les toucha aucunement, & ne leur fit aucun ennuy; & lors ils chanterent vn beau Cantique de benediction au Seigneur. Ce que voyant Nabuchodonosor, il s'approcha de l'huis de la fournaïse, & en fit sortir Sidrach, Misach & Abdenago, & les exalta en la Prouince de Babylone.

Daniel 3. Chap.